

Velodrom DBKL boleh diguna...

BH 23/11/88

Oleh RAZALI YAHYA

VELODROM Dewan Bandaraya Kuala Lumpur (DBKL) akan menjadi 'velodrom sokongan' untuk Sukan SEA di Kuala Lumpur tahun depan, jika Velodrom Rakyat di Ipoh gagal disiapkan mengikut jadual.

Setiausaha Jawatankuasa Pengelola Sukan SEA, Datuk Abu Bakar Said, berkata: "Walaupun Velodrom DBKL dijangka siap sepenuhnya pada 4 Julai, acara trek lumba basikal tetap diadakan di Ipoh sebagaimana diputuskan oleh Menteri Belia dan Sukan, Datuk Najib Tun Abdul Razak sebelum ini".

Beliau berkata demikian selepas melawat tapak pembinaan projek Velodrom DBKL di Cheras pagi semalam. Turut hadir ialah Ketua Pengarah DBKL, Mohd Noor Abdul Rahim dan beberapa pegawai yang terbabit dengan projek itu.

"Saya berpuas hati mengenai penerangan Velodrom DBKL yang berharga \$8.8 juta itu. Sama ada ia akan dijadikan sebagai gelanggang utama acara trek, banyak bergantung sejauh mana kemajuan pembinaan velodrom di Ipoh.

"Ini tidak bermakna Velodrom DBKL diketepikan sama sekali. Jika berlaku kemungkinan buruk berhubung dengan Velodrom Rakyat itu, pihak penganjur Sukan SEA tidak ada pilihan selain memilih velodrom di Kuala Lumpur sebagai pilihan utama," ujar beliau.

Datuk Abu Bakar juga adalah Pengerusi Jawatankuasa Kemudahan dan Setiausaha Jawatankuasa Pengelola Sukan SEA yang dijadual berlangsung pada 20 hingga 31 Ogos tahun depan. Terdahulu, beliau bersama beberapa pegawai jawatankuasa

kemudahan Sukan SEA sudah menghadiri taklimat termasuk melawat projek pembinaan Velodrom Rakyat di Ipoh.

Selain velodrom bertaraf Olimpik, DBKL turut menyiapkan beberapa lagi kemudahan untuk kegunaan Sukan SEA. Semua keperluan yang dibangunkan oleh DBKL itu membabitkan perbelanjaan lebih \$30 juta.

Sementara itu, Ketua Pengarah DBKL, Mohd Noor Abdul Rahim berkata: "Velodrom yang dirancang dan dijangka siap sepenuhnya pada 4 Jun tahun depan, bukan untuk kegunaan Sukan SEA, sebaliknya ia sudah dirancang sejak dulu lagi".

Gelanggang

Katanya, velodrom adalah sebahagian daripada gelanggang sukan yang dibina di sekitar Bandar Tun Abdul Razak dan ia adalah rancangan yang sudah lama diputuskan untuk dibina di Kuala Lumpur.

"Sama ada Velodrom DBKL akan digunakan untuk acara trek pada Sukan SEA tahun depan terserah pada Penganjur Sukan SEA untuk memutuskannya. Kami bersedia memberikan sumbangan bermakna jika pihak terbabit berminat dalam hal ini," katanya.

Katanya, walaupun Velodrom DBKL mungkin tidak dijadikan gelanggang acara lumba basikal Sukan SEA, ia tetap dibuka untuk disewakan kepada semua pihak sebagai gelanggang latihan.

■ TAK LAMA SIAPLAH... Setiausaha jawatankuasa pengelola Sukan SEA, Abu Bakar Said (tiga dari kanan) ketika melawat tapak pembinaan Velodrom DBKL di Cheras pagi semalam.

